

Faruk Selmanović
Zastupnik u Skupštini Kantona Sarajevo

Bosna i Hercegovina
Federacija Bosne i Hercegovine
Kanton Sarajevo
Skupština Kantona Sarajevo
Kolegiju Skupštine Kantona Sarajevo

Uputiti: Ministarstvu unutrašnjih poslova Kantona Sarajevo i Policijskoj upravi Centar

PREDMET: Inicijativa za stalnim prisustvom policije u ulici Bolnička

Poštovani,

U skladu sa članom 213. Poslovnika Skupštine Kantona Sarajevo, upućujem Ministarstvu unutrašnjih poslova Kantona Sarajevo i Policijskoj upravi Centar “ Inicijativu za stalnim prisustvom policije u ulici Bolnička “.

O B R A Z L O Ž E N J E

Inicijativa za povećanje sigurnosti u ulici Bolnička, reakcija na premještanje Metadonskog centra

U proteklim danima, stanovnici naselja Višnjik i Breka iskazali su opravdanu zabrinutost i negodovanje zbog premještanja Metadonskog centra s lokaliteta Crni vrh u ulicu Bolnička. Zbog toga su uputili zahtjeve nadležnim institucijama Kantona Sarajevo za hitno izmještanje navedenog centra.

U svom obraćanju ističu da je ova odluka donesena bez ikakvog uključivanja lokalne zajednice, bez konsultacija, javne rasprave ili uvida u moguće posljedice.

Premještanje centra za ovisnike u blizinu osnovnih škola, vrtića, fakulteta, zdravstvenih ustanova i gustog stambenog naselja predstavlja direktnu prijetnju sigurnosti, zdravlju i svakodnevnom miru porodica koje žive u ovom dijelu grada.

Već sada su primijećeni zabrinjavajući incidenti: pronađen narkomanski pribor na dječijim igralištima, rizične situacije u blizini škola i ambulanti, te opravdan strah roditelja za sigurnost djece uoči početka školske godine. Dodatno zabrinjava podatak objavljen u medijima da je park „Kemal Monteno“ zatvoren zbog opasnosti od zaraznih materijala nakon što je utvrđeno da su pojedinci u njemu konzumirali narkotike.

S tim u vezi, upućujem Inicijativu Ministarstvu unutrašnjih poslova Kantona Sarajevo i Policijskoj upravi Centar za uspostavu stalnog prisustva policije u ulici Bolnička. Smatram da je nužno osigurati prisustvo najmanje jedne policijske patrole po smjeni, koja bi patrolira i nadzirao navedeno područje.

Također podsjećam da sam još 26.12.2024. godine, u svojstvu zastupnika u Skupštini Kantona Sarajevo, uputio Inicijativu Vladi i Skupštini Kantona Sarajevo kojom sam predložio uspostavljanje sigurnih zona oko škola, s trajnim prisustvom policije, upravo zbog ovakvih i sličnih razloga. Napominjem da se u ovom dijelu grada nalaze četiri fakulteta, dvije osnovne škole, više vrtića, produženi boravci, Studentski dom Bjelave, kao i obnovljeni parkovi koje svakodnevno koriste djeca i porodice. Posebno naglašavam da je u ovom dijelu grada smještan i Dječji dom Bjelave, čiji štićenici predstavljaju jednu od najosjetljivijih i najrizičnijih kategorija u društvu. Sve to dodatno potvrđuje potrebu za hitnim postupanjem i zaštitom ovog područja.

Očekujem hitnu reakciju nadležnih institucija u cilju zaštite sigurnosti građana i očuvanja javnog reda i mira.

S poštovanjem,

Sarajevo, 7.8.2025. godine

Faruk Selmanović, Zastupnik u Skupštini Kantona